

Date – 09/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Assembly Speaker Pu Lalbiakzaman House member-te chu House chhunga awm dan mawi zawm tur leh House zahawmna tibawrhbang thei zawnga khawsa lo turin a chah.
2. India Constitution schedule pariatna hnuaiia Mizo telh tura hmalakna turah MZP leh Hnampual zirlaiten thutlukna an la siam ve loh thu zirlai pawl ten an sawi.
3. Prime Minister Narendra Modia chuan ramchhunga damdawiin leh ruhrel pawimawhte tunhnaiah nasa taka thumthat a ni a ti.
4. External Affairs Minister Dr.S.Jaishankara chuan West Asia-a inepna boruak sosang zel tidai turin dawhkan kila inbiak a tul thu a sawi

<><><>

ASSEMBLY SPEAKER

Assembly Speaker Pu Lalbiakzaman House member-te chu House chhunga awm dan mawi zawm tur leh House zahawmna tibawrhbang thei zawnga khawsa lo turin a chah.

Pu Lalbiakzama hian vawiin khan Assembly session-a zawhna leh chhanna hun intan hmain House member-te tan thuchah a puang a - Mizoram State Legislative Assembly chu state dangte Assembly House lakah ram rorelna nuam leh India ramah chuan tha filawrlak anga sawi a nih thin thu a sawi.

House member-te chuan House chhunga ram rorelnaah dikna chanvo an neih rualin, hei hian mawhphurhna (a keng tel tih erawh hriat a that thu Speaker chuan a sawi a, right an nei tih vanga an mawhphurhna theihnghilh thaka House chuanga sapatal a rem loh mai bakah hetiang chetna hi ram rorelna in leh ram mipui zah lohna lian tak a nih thu a sawi bawk.

<><><>

SESSION-DEMAND

Vawiin Assembly session-ah minister pahnih Pu PC Vanlalruata leh Pi Lalrinpuiite department sum mamawh -te sawiho a ni a; sorkar kum 2026-27 atana inenkawl nan an hmang dawn a ni.

Minister Pu PC Vanlalruata hian a department enkawl 3 tan cheng vbc 361 point 15 a demand-a; Agriculture & Farmers Welfare tan cheng vbc 242 point 63 niin, Cooperation department tan cheng vbc 18 point 81 leh Irrigation & Water Resources tan cheng vbc 99 point 70 a ni.

Minister Pi Lalrinpuii hian a department enkawl 2 - Health & Family Welfare department tan cheng vbc 909 point 29 leh Social Welfare, Women & Child Development department tan cheng vbc 326 point 90 a demand a, a vaiin Pi Rinpuii demand hi cheng vbc 1,236 point 20 a ni.



SESSION-HOME MINISTER

Home minister Pu K Sapdangan kum 2021 atanga nikum 2025 thleng khan Mizoram-ah police 672 an thi a, police-te thihchhan langsar zual chu cancer leh thin ro a ni a ti.

Vawiina Assembly session zawhna chhangin Pu K Sapdanga chuan, kum 5 chhungin Mizoram Police mi leh sa 672 an thi a, chungte chu kum 2021-ah mi 134, kum 2022-ah mi 145, kum 2023-ah mi 123, kum 2024-ah mi 146 leh kum 2025-ah mi 124 an thi a; heng police-te thichhan tam ber chu cancer leh thin ro a nih thu a sawi.

Pu K Sapdanga chuan police sa thi nasa lutuk tihziawm tumin theihtawp an chhuah thu a sawi a, ngun takin police officer leh hotuten an ngaihtuah reng a, kum 2024-25 khan fitness lamah tan an la vak a, hei hian a tiziaawm viaute pawhin an hriat thu leh natna hi medical lam thil a nih avangin medical lama mithiamte nen inrawn zelin theihtawp an chhuah thu a sawi bawk.



OFFICIAL RESOLUTION

Education minister Dr Vanlalhlana official resolution, "Eighth Schedule of the Constitution of India-ah Mizo Tawng telh tura hma lak ni rawh se" tih chu waviin khan Assembly session-ah pawm a ni.

Resolution hi House Leader Pu Lalduhoma leh Leader of Opposition Pu Lalhhandama Ralte bakah party-tin aiawh mi pakhat theuhten an thlawp thu an sawi a; resolution-a thumal pakhat thlakin - 'Eighth Schedule to the Constitution of India-ah Mizo Tawng hi telh tura hma lak ni rawh se' tiin lungrual takin an pawm a ni.

Dr Vanlalhlana chuan NGO lian tak tak MUP, MHIP, YOUNG LAI ASSOCIATION, MARA YOUTH ASSOCIATION , CHAKMA ASSOCIATION, BRU ASSOCIATION TE ZIRLAI PAWL, MZP, MSU, CHAKMA STUDENT UNION, BRU STUDENT ASSOCIATION, LAI STUDENT ASSOCIATION, MARA STUDENT ASSOCIATION , BAWM STUDENT ASSOCIATION , PANG ZIRLAI PAWL, RANGLONG STUDENT ASSOCIATION leh SIAMSINPAWLPI STUDENT ASSOCIATION te pawhin Mizo tawng dah an lo support tawh a Mizo Language Development Board te pawn hemi atan hian a hrangin an lo kawm tawh bawk a ti a, sorkar hmasa khan MLB bill 2022 kha he house ah hian pulutin pass pui an lo ni tawh a feb 2023 MLB board office chu hawn a ni leh Eight shcedule a mizo tawng dah a nih theih nan hma nasa takin tan an lak thu a sawi bawk.

Dr Vanlalhlana chuan, Mizo tawng Eight schedule-a telh anih chuan Parliament ah MP ten Mizo tawngin thu an sawi thei tawh anga, Chiang leh fiah leh zualin mahni tawng ngeiin Delhi tlangah mipui aiawh ten thu an sawi thei tawh anga, Central Service ah hian Mains Exam ah mizo tawngin thalai ten an chhang thei tawh anga hei bakah hian nasa leh zualin kan ziakmi te tan kawng a in hawng thei dawn a NBT te hian a ngaihsak leh zual dawn a ni a ti a, Sahitya Academy te, Central Institute of Languages te, Technology Development for India Languages te hian nasa leh zualin mizo tawng tan hma a la thei tawh dawn a, award te leh thil hrang hrang lehlin kawngah leh a zirbingna kawngah te hma min lakpui thei tawh dawn a ni a ti.

<><><>

MZP

India Constitution schedule pariatna hnuai Mizo telh tura hmalakna tur resolution Education Minister Dr Vanlalhlana vawiin session a putluch chu hun lo an tih thu leh, MZP leh Hnampual zirlaiten thutlukna an la siam ve loh thu zirlai pawl te hian an sawi.

MZP President Dr C Lalremruata chuan ah MZP leh Jt. Hnampual tangkhawmte chuan vawiin Khan Aizawl Press Club-ah thuthar thehdarhtute kawm-in Eight Schedule of the Constitution of India-ah Mizo tawng telh tura hma lak tur thu an pass tak ah session a Education Minister leh Chief Minister ten MZP leh Hnampual zirlai an pawmpui thu an sawi lan ah -an pawmpui thu emaw remtihna an sawi chhuaklo an ti a,

MZP President Dr C Lalremruata chuan zofa hnam hrang hrang zingah hian 8 Schedule ah Mizo tawng dah dawn se tute tawng nge mizo tawng tih leh tute tawng nge awm se tih chu an ngaihtuah na leh an zawhna anih thu a sawi a, zo hnahthlak hrang hrang te tawng hi Mizo tawng a nih vek thu sawiin – Lusei, Hmar, Paite leh Lai ah hian a khawi ber nge Mizo tawng tih ah dah anih dawn a ti a, hemi chungchang hi MZP leh Hnampual Zirlai pawl hrang hrang te an pawm tlan theih hunah pass nise an duh thu a sawi bawk.

MZP leh Hnampual Zirlai te leh Central YMA ten Mizo Language Development Board te inkawm khawmnaa an minute bu ah pawh a la hun hrih loh thu leh nghah hrih phawt an duh thu an ziah lan laia Assembly Session ah Education Minister leh Chief Minister ten MZP leh Hnampual zirlai pawlten an pawmpui ni anga an sawi chu mak an tih thu a sawi a, Mizo Language Development Board hnuai Eight Schedule Study Group ten sorkar hnenah thudik tawklo an thlen ni ngeiin an ngai a ti a ni.

Hei bakah hian Mizo Zirlai Pawl (MZP) chuan sorkar laipuiin tunhnai a sorkar function leh zirna in hrang hrangah India hnam hla sak emaw ngaihthlak tur ti a thupek a tichhuak chu tha an ti lo tih a sawi a, school, college leh sorkar office-ah te Vande Mataram ngaihthlak emaw sak emaw tura tih hian ngaih a ti thatloh hle thu leh India Constitution hnuai Mizote vohbikna leh humhalhna dan palzutna ni ngeiin an ngai an ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PIB VARTALAP

Sorkar laipui Ministry of Information & Broadcasting hnuai Press Information Bureau PIB chuan Lunglei Press Club-ah One Day Media Workshop, “VARTALAP” an hmang a, VB G Ram G leh National AIDS & STD Control Programme” chungchang inzirtirna hun hman a ni.

Lunglei DC Pi Navneet Maan leh YMA Sub Hqr Vice President, Pu CMS. Dawngliana bakah Lunglei MJA Vice President Pu F.Lalngaihzuala ten an hmanpui a, DC chuan HIV/AIDS chungchang chu India ram pum sawi loh, Mizoram leh Lunglei tan a ngaihven ngai tak a ni tih sawiin heng thil zirho hi hriatchian a ngai a, tun hi inzirtir hun tak a ni a ti. Ram leh hnam in hmasawna tuantling kum 2047 a neih a tum lamtluang a zawh naah hian hriselna a pawimawh a, hriselna tello chuan engmah a nih theih lova, chuvangin Viskshit Bharat a thlen theih nan HIV/AIDS chungchangah hriatna zau leh dik neih a pawimawh a ti a ni.



TUICHHUAHEN POISON

Tukin khan Kolasib mipui Tui tlan ber Tuichhuahen lui chu Tur a hrai a ni tih hriat a ni a, Kolasib PHE Department, Kolasib Sub-Hqrs YMA hruaitute leh Fisheries Deptt a thawktute chuan a hmunah kalin an enfiah nghal a. A enfiah tute hian Sangha thi an hmu nual ani.

Hemi chungchang ah PHE Department chuan hma la nghal in, a sample atana an lak Tui chu District Laboratory ah enfiah nghal a ni a, an enfiahna ah hian Tui chu mihring ei/in atan a thianghlim tih an finfiah a, hetiang hi thil awmdan anih avangin vawiin vek khan Tui hi pump chhunzawm in, sem chhuah leh nghal a ni.

Tuichhuahen lui Tui an hraina hmun tak hi hriat nilo mahse, tui lak na hmun thlang lam a nih rin a ni. Hetihlai hian Tuichhuahen lui Tur a hrai tute hi man an la nilo a ni.



PM POST BUDGET WEBINAR

Prime Minister Narendra Modia chuan ramchhunga damdawiin leh ruhrel pawimawhte tunhnaiah nasa taka thumthat a ni a ti. Vawiina Post-budget webinar ah he thu hi sawiin Pu Modia chuan mipuite beiseina tihlawhtlin chu sawiho maia tawp chi anih loh thu sawiin budget inngahna ber leh sawrkar mawhphurhna ber a ni a ti a. Ayushman Bharat Yojana leh Arogya mandi hmangin thingtlangah damlo enkawlina tha zau zawka tihlen anih thu a sawi bawka a ni.



EAM STATEMENT

External Affairs Minister Dr.S.Jaishankara chuan West Asia-a inepna boruak sosang zel tidai turin dawhkan kila inbiak a tul thu a sawi. Vawiin Lok Sabha-a statement a siamah he thu hi sawiin Dr.Jaishankara chuan India sawrkar chuan thla hmasa ni 20 khan West Asia chungchangah hian thuchhuah a lo siam tawh tih sawiin he boruak inmung chhoh lai khan lehlam pawl ve ve te chu inthunun hram hram turin a ngen a ti a. India chuan inbiakna leh indawrna puitling tak neih chu remna siamna kawnga hmanraw pawimawh ber a ni tih hi a la ringnghet tlat a ti bawk. Pu Jaishankara sawidanin nimin thleng khan Asia khawthlang buaina avang hin India mi mi sing 6 leh sang 7 chuang an lo haw tawh a ti bawk a ni.

<><><>